

NYUMBA YETU

SITRA HUSSEIN

Mimi na familia yangu tunaishi jijini Nairobi, mtaa wa South B, Golden Gate Estate. Nyumba yetu ni ya kuvutia sana na ipo katika maeneo tulivu yenye majirani wema. Tuna ua mdogo mbele ya nyumba ambapo mama yangu hupanda maua mazuri ya waridi, jasmine na sunflower. Kila asubuhi, mama yangu hupenda kumwagilia maua haya ili yaendelee kunawiri na kunukia vizuri. Nyumba yetu ina lango jeupe la chuma ambalo hulindwa kila wakati ili kuhakikisha usalama.

Ndani ya nyumba yetu, tuna vyumba vitatu vya kulala, sebule, jiko na mabafu mawili. Sitting room yetu ni kubwa na imepambwa kwa rangi nzuri zinazofanya ionekane ya kuvutia. Tuna sofa laini za rangi ya kijivu na meza ya kahawia katikati. Mama yangu hupenda kuweka mapambo mazuri kama maua kwenye meza na mapambo madogo ya ukutani. Katika sebule yetu, pia kuna runinga kubwa ambayo sisi hutazama kwa pamoja jioni. Baba yangu anapenda kutazama habari ili kufuatilia matukio ya dunia, mama hupenda vipindi vya mapishi, lakini mimi hupendelea katuni na michezo ya watoto. Wakati mwingine, tunakaa pamoja na kucheka tunapozungumza kuhusu mambo ya siku yetu.

Jikoni kwetu ni safi na pana, lenye rafu nyingi za kuweka vyombo na friji kubwa ya kuhifadhi vyakula. Mama yangu ni mpishi mzuri sana, na kila siku hupika vyakula vitamu kama wali, samaki, mboga na chapati. Harufu ya chakula chake mara nyingi huenea hadi sebuleni na kutufanya sisi sote tuhisi njaa hata kabla ya chakula kuiva. Mara nyingi mimi humsaidia mama kunyofoa mboga, kupanga vyombo na kupanga meza kabla ya kula. Tunapokula chakula cha jioni, tunakaa pamoja mezani na kuzungumza kuhusu masomo yetu shuleni, marafiki zetu na mambo mengine mazuri yanayotokea. Baba yangu mara nyingi hutufundisha maadili mazuri wakati wa kula, kama kusema "tafadhali" na "asante" tunapoomba kitu mezani.

Nje ya nyumba yetu, mazingira ni safi na salama kwa watoto kucheza. Kuna watoto wengi wa rika langu, na kila jioni tunapomaliza kazi za shule, tunapenda kucheza michezo kama kurusha kamba, rede na mpira wa miguu. Pia kuna duka dogo karibu ambapo mimi na marafiki zangu huenda kununua peremende, pipi na juisi. Wakati mwingine, tunakaa kwenye kivuli cha mti mkubwa uliopo karibu na nyumba yetu tukiongea na kucheka. Ninapenda sana kuishi hapa kwa sababu

ni mahali pazuri, pananifanya nijisikie furaha na salama. Nyumba yetu si tu sehemu ya kulala, bali ni mahali tunapopata upendo, furaha na utulivu. Napenda sana nyumba yetu!